

Umno T'ganu anjur konvensyen pulihkan 'kemelut'
Malaysiakini.com
October 10, 2010

Badan Perhubungan Umno Terengganu akan menganjurkan konvensyen selama dua hari mulai Jumaat ini yang bakal disertai pelbagai golongan.

Ia bertujuan untuk memantapkan hala tuju dan meningkatkan kecemerlangan parti dan pentadbiran kerajaan negeri, kata Setiausahanya Datuk Tengku Putera Tengku Awang.

"Semua peringkat kepimpinan parti, ilmuan agama, kelompok cendekiawan, golongan profesional, penjawat awam, pemimpin pertubuhan bukan kerajaan, aktivis masyarakat dan generasi belia akan menyertai konvensyen ini.

"Peserta akan diberi peluang untuk berkongsi dan mencadangkan idea baru bagi memperbaiki segala kelemahan yang mungkin ada dalam parti dan juga sistem pentadbiran kerajaan negeri," katanya kepada pemberita di Kuala Terengganu hari ini.

Tengku Putera yang juga Speaker Dewan Undangan Negeri Terengganu berkata konvensyen itu juga diharap dapat memulihkan apa yang berlaku dalam Umno Terengganu.

Konvensyen akan dirasmikan oleh Pengerusi Badan Perhubungan Umno Terengganu, Datuk Seri Hishammuddin Tun Hussein dan ditutup oleh Menteri Besar Datuk Seri Ahmad Said.

--Bernama

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/144915>